



FREUNDE DER NEUEN HÄRTE: GWALT, WILLS GFALLT.

Uf Wolgge siibe, dritti Schtuefe,
het me e Sitzig yberuefe,
presänt sin der Michael, dr Gabriel und dr Raphi,
sy dringge zämme e himmlische Kaffi.
D Jungfrau Maria, derfsch dreymool roote,
die isch nur do wäge dr Frauequote,
sy wais nit rächt, was sy mache soll,
drum ibernimmt sy s Protokoll.
Dr Heerr als CEO vom Himmelszält
mecht Informatioone iber d Wält,
är haig vernoo, sait die himmlischi Gschtalt,
ur der Ärde herrschi Chaos und Gwalt,
und d Ärdebürger könn me kumm me haile,
die dätte sich an der Gwalt no begaile.
Glatzköpf und Vermummti zaige, wie s goht,
wie me ain zum Plausch schpitaalryff schloot.
Uf e Punggt brocht, haisst das kurz und gnabb:
Gits Zoff, goht de Gwaltberaite sofort ain ab.

Die Gwalt, wo gfallt, macht dr CEO muss:
„Lueg, dr Bush hängt gnüssig dr Saddam uf“.
Dr Erzängel Raphael sait ganz verschteert:
„Mir wärs au glych, s wär umgekehrt.“
Doch Gwaltberaitschaft miech us dr Wält
e Pulverfass und e Myynefäld.
S jüngschi Gricht käm scho in Rate:
Jubilate, jubilate!

Dr Erzängel Gabriel losst d Flügel hängge
und zieht sich zrugge zem nochedängge.
Pletzlich verwacht är us de himmlische Sphääre:
„Me muess däne Brieder dr Tarif erklääre!
Oh Vater unser, bitte wehr dy,
und wird zem Fründ vo dr neye Härti.“
Dr Erzängel Michi züggt sy Schwärt:
„E friidligi Botschaft het do kai Wärt,
kumm CEO, gib dr doch e Rugg
und zahl mit glycher Münze zrug.“
Zerscht hätte sy no e Roosegranz,
denn gründe sy die hailig Gwalt-Allianz.
Im Sänggfluug jette die Funktionäär,
als ob grad e Erzängel-Flugjoehr wär.
S fasst jede no schnäll zwai Handgranate.
Jubilate, jubilate!

Jetzt wird e anders Windli waije,
jetz wird sich d Gwalt-Schpirale draije,
jetz wird uf Gwalt mit Gwalt agiert,
so lang bis alles eskaliert.

Zündsch Auti aa, kasch sicher sy,
s näggscht brennend Auti, das isch dy,
und hesch kai Auti aa, dängg do dra,
denn zünde d Ängel s Rollbrätt aa.
Alli, wo wänn d Wänd verschrpraye,
dien sy diräggt in Schpraylagg keye,
und schiessisch miteme Pflaschterschtai,
denn schiesse d Ängel aifach zwai.
Wenn d ain verletzisch, denn waisch,
die mache us dir Gammelflaisch.
Aug um Aug und Zahn um Zahn,
s goht fascht zue wie bym Oli Kahn.
So gänn die militante Himmelskämpfer
dr Gwalt no Rugghalt schtatt e Dämpfer.
Mit Boxe, Wrestling und Karate.
Jubilate, jubilate!

Schuldzuefyysige sotts nit gäh,
doch mues sich s Färnseh an dr Naase näh!
Vo zoobe schpoot bis dermorge frieh
kasch Horrorschtraife yynezieh.
Gwalt findsch au im Internet,
s waiss jede, wo s so Websites het.
In Wirtschaftskrais und natürlig politisch
isch me by Gwalt vyyl weniger kritisch,
dert goht me de Repressalie uf e Lyym,
die Gwalt isch absolut legitim.

Gwalt in dr Ehe und Gwalt im Schport.
und psychischi Gwalt am Arbetsort,
mit Gwalt wirsch täglich konfrontiert,
so lang, bis d Gwalt au die verfiehrt.
S sin Zueschtänd wie in de Verainigte Schtaate.
Jubilate, jubilate!

D Hemmschwelle het me wie verruggt
aifach obe abe druggt.
Uf ethischi Grundsätz kasch nimm baue,
denn jede will d Lizänz zem haue.
Doch d Hauptursach by Maa und Sohn
isch dr Überschuss an Testosteron,
e bitzli Epo no drzue
und scho hesch vor kaim Maa me Rueh.
Dangg Testosteron entwigget der Knabe
sy vorpubertärs Imponiergehabe.
Chromose und Hormon sin allem aa
d Ursach für s Gwaltspotential vom Maa,
für dr Zerschtörigstriib vo Rabiате.
Jubilate, jubilate!

D Löösig haisst, falls es überhaupt aini git:
Verschliesset bitte d Auge nit!
Wär d Gwalt verherrlicht oder drüber ka lache,
dä duet sy salonfähig mache.
Mitschuldig isch nämmlig, y bi iberzygt,
wär nyt seht, nyt hört und vor allem, wär schwygt.

Und falls das alles duesch ignoriere,
denn dueny dr aini betoniere,
e Fuscht ins Gsicht by aller Huld!
Y ka nüt drfüür, d Hormon sin schuld!

Vom Fasnachtsmändig zoobe bis am Fasnachtsmittwoch dermorge gits
uf em Münschterplatz e gwaltige Ladärne-Demo